



*La Conception de Iesus-Christ est annoncée par l'Ange Gabriel,
à la Vierge Marie.*

EN l'an du monde trois mille neuf cents soixante & deux, & le quarante-deuxième du regne d'Auguste Empereur Romain, que la paix estoit vniuerselle, l'Ange Gabriel fut enuoyé de Dieu au sixième mois en Nazareth ville de Galilée, à vne Vierge nommée Marie, espousée à Ioseph, issu de la maison de Daud ; & quand l'Ange fut entré où elle estoit, il dit : Je te saluë pleine de grace, le Seigneur est avec toy, tu est benite entre les femmes : Et quand elle eut oüy, elle fut troublée de son propos, & pensoit quelle estoit cette salutation. Adonc l'Ange luy dit : Marie ne crains point, car tu as trouué grace enuers Dieu ; & voicy tu conceuras en ton ventre, & enfanteras vn fils, & nommeras son nom IESVS, & s'appellera le fils du Souuerain, & le Seigneur Dieu luy donnera le throsne de Daud son pere, & son regne sera sans fin. Lors Marie dit à l'Ange, Comment se pourra faire cecy, veu que ie ne connoy point d'homme ? Et l'Ange luy dit, Le S. Esprit suruiendra en toy, & la vertu du Souuerain t'obombrera. Et voila Elizabeth ta cousine a conceu aussi vn fils en sa vieillesse ; car rien n'est impossible à Dieu. Adonc Marie dist, Voicy l'ancelle & seruante du Seigneur, me soit fait selon ta parole. Ainsi l'Ange se partit d'elle.

Saint Luc Chap. 1.